

AMANAT KETUA PERANGKAWAN MALAYSIA KE-10

"Memperkukuh Kepercayaan, Memperhebat Keupayaan"

Bismillahirrahmanirrahim.

Assalamualaikum warahmatullahi wabarakatuh,
Salam Sejahtera dan Salam Malaysia MADANI.

Alhamdulillah, setinggi-tinggi kesyukuran dipanjatkan ke hadrat Allah SWT. Saya merakamkan penghargaan kepada Yang Berbahagia Tan Sri Ketua Setiausaha Negara dan Yang Berbahagia Datuk Seri Ketua Setiausaha Kementerian Ekonomi atas kepercayaan dan amanah yang diberikan untuk menerajui Jabatan Perangkaan Malaysia (DOSM) sebagai Ketua Perangkawan. Amanah ini merupakan satu tanggungjawab besar dalam memastikan statistik rasmi negara terus relevan, berkualiti dan berintegriti.

Saya juga ingin merakamkan setinggi-tinggi penghargaan dan ucapan terima kasih kepada semua mantan Ketua Perangkawan Malaysia yang telah menerajui Jabatan Perangkaan Malaysia (DOSM) dengan penuh dedikasi, kebijaksanaan dan komitmen. Segala usaha, kepimpinan serta legasi yang telah dibina menjadi asas yang kukuh untuk saya meneruskan kecemerlangan Jabatan ini.

Memperkukuh Kepercayaan Terhadap Statistik Rasmi

Landskap dunia hari ini berubah dengan pantas. Perkembangan teknologi digital, kecerdasan buatan, kemunculan sumber data baharu serta peningkatan jangkaan terhadap penyampaian perkhidmatan awam menuntut Sistem Statistik Negara untuk turut berevolusi. Dalam persekitaran yang semakin kompleks, statistik rasmi bukan sahaja perlu tepat, malah perlu lebih pantas, lebih terperinci dan lebih bermakna dalam menyokong pembuatan keputusan yang berasaskan data di semua peringkat.

Sehubungan itu, kepercayaan terhadap statistik rasmi perlu terus diperkukuh berteraskan kualiti, integriti, profesionalisme dan kerahsiaan. Prinsip ini selaras dengan Akta Perangkaan 1965 (Disemak 1989) serta *United Nations Fundamental Principles of Official Statistics* (UNFPOS) yang menjadi panduan merentasi agensi statistik rasmi seluruh dunia. Berlandaskan prinsip ini, momentum transformasi yang telah dibina akan diteruskan dengan penekanan kepada pelaksanaan yang lebih berfokus dan berimpak tinggi, sejajar dengan Pelan Strategik Jabatan 2026–2030 dan Agenda Reformasi Perkhidmatan Awam serta keutamaan pembangunan negara.

Pemantapan Undang-Undang Statistik

Kepercayaan terhadap statistik rasmi perlu disokong oleh kerangka perundangan dan tadbir urus yang mantap bagi memastikan Sistem Statistik Negara terus relevan dan berwibawa. Dalam hal ini, usaha pemantapan undang-undang statistik melalui penggubalan Rang Undang-Undang Statistik 2026 akan terus diberi keutamaan bagi

memperkuh mandat, penyelarasan dan akauntabiliti melalui pendekatan keseluruhan kerajaan (*Whole-of-Government*). Kerangka yang lebih komprehensif ini akan turut meningkatkan keberkesanan perkongsian dan penggunaan data pentadbiran merentasi kementerian dan agensi ke arah pengukuhan statistik sosial, ekonomi, alam sekitar dan lain-lain bidang yang diperlukan negara.

Memperhebat Keupayaan Organisasi

Keupayaan institusi untuk menerajui Sistem Statistik Negara memerlukan organisasi yang tangkas, berfokus dan bersedia menghadapi sebarang perubahan. Sehubungan itu, DOSM akan terus diperhebat melalui penambahbaikan struktur, fungsi dan sumber manusia secara lebih strategik bagi memastikan setiap peringkat organisasi dapat berfungsi secara optimum dan saling melengkapi. Pendekatan perekayasaan semula proses kerja (*Business Process Reengineering*) akan dilaksanakan bagi memperkuh keberkesanan penyampaian DOSM. Usaha ini akan disokong oleh pengurusan bakat dan pelan penggantian yang lebih sistematik, serta diselaraskan dengan keperluan organisasi. Penempatan pegawai berasaskan kompetensi dan potensi perlu dilaksanakan secara lebih strategik-bagi memastikan organisasi sentiasa didukung oleh bakat terbaik yang mampu memenuhi keperluan masa kini dan masa hadapan.

Keutamaan Terhadap Pembangunan Kapasiti

Pembangunan kapasiti sumber manusia akan terus menjadi keutamaan bagi memastikan DOSM kekal berupaya mendepani perubahan landskap data dan teknologi yang semakin pesat. Institut Latihan Statistik Malaysia (ILSM) akan terus diperkasa sebagai pusat kecemerlangan dalam pembangunan ilmu, kepakaran dan inovasi statistik dan data bagi melahirkan tenaga kerja yang berdaya saing, adaptif dan bersedia menghadapi keperluan dinamik Sistem Statistik Negara. Pada masa yang sama, statistik rasmi akan terus diperkaya melalui penghasilan statistik yang lebih terperinci (*granular*), analisis yang lebih bernilai tambah serta naratif berasaskan bukti yang mampu memberikan pemahaman yang lebih menyeluruh terhadap isu-isu sosioekonomi, sekali gus memperkuh sokongan kepada perancangan dasar dan pembuatan keputusan yang lebih tepat dan berimpak.

Penutup

Masa hadapan sistem statistik negara bergantung kepada keupayaan DOSM untuk terus menyesuaikan diri dengan perubahan, memelihara integriti dan memperkuh keupayaan institusi secara berterusan. Kepercayaan dan keupayaan perlu bergerak seiring; statistik rasmi yang berwibawa hanya dapat dihasilkan oleh organisasi yang kompeten, profesional dan berintegriti. Dengan iltizam, profesionalisme dan kebersamaan seluruh warga DOSM, agenda yang digariskan ini akan menjadi pemangkin kepada pengukuhan Sistem Statistik Negara yang berwibawa demi menyokong pembangunan negara dan kesejahteraan rakyat.

Akhir kata, saya menyeru seluruh warga DOSM agar berganding bahu dan memberikan komitmen sepenuhnya dalam merealisasikan amanah ini. Saya percaya, dengan kerjasama, profesionalisme, integriti serta iltizam yang tinggi daripada seluruh warga DOSM, kita mampu terus memperkasakan Sistem Statistik Negara demi memenuhi keperluan kerajaan, rakyat dan pemegang taruh.

Marilah kita melangkah seiring sebagai satu pasukan, meneruskan legasi kecemerlangan dan mencipta kejayaan baharu demi memartabatkan DOSM sebagai peneraju statistik yang unggul, dipercayai dan berwibawa pada peringkat nasional dan antarabangsa.

Sekian, terima kasih.

“Statistik Nadi Kehidupan”

Siti Asiah Ahmad

Ketua Perangkawan

17 Julai 2026